

## SIARAN MEDIA

### **1,000 WANITA SARAWAK JALANI SARINGAN UJIAN HPV DNA DALAM MASA SEHARI**

**KUCHING, 30 SEPT.** - Program KASIH Keluarga: Gempur Saringan Kanser Serviks Sarawak adalah satu usaha ke arah eliminasi kanser serviks bagi Negeri Sarawak menjelang tahun 2030. Sekaligus, sebagai usaha untuk mencapai 1,000 atau lebih wanita menjalani saringan ujian HPV DNA secara besar-besaran dan dicatatkan di dalam The Malaysia Book of Record (MBOR).

Menteri Pembangunan Wanita, Keluarga dan Masyarakat, Dato' Sri Hajah Nancy Syukri dalam sidang media semasa pelancaran program bersama Timbalan Premier, Dato Sri Prof. Dr. Sim Kui Hian berkata, "Program kerjasama Lembaga Penduduk dan Pembangunan Keluarga Negara (LPPKN) dan Jabatan Kesihatan Negeri Sarawak (JKNS) ini dilaksanakan di Negeri Sarawak berdasarkan Laporan Registri Kanser Kebangsaan Malaysia, Sarawak mencatatkan kadar insiden kanser serviks yang paling tinggi iaitu 9.6 kes bagi setiap 100,000 orang wanita setiap tahun.

Menurut Dato' Sri Nancy, Sarawak mensasarkan seramai **12,000** wanita untuk menjalani Ujian HPV DNA sehingga Disember ini dan sehingga Ogos lalu, seramai **4,599** wanita di negeri ini telah tampil untuk menjalani ujian HPV DNA, "Setakat ini Sarawak telah mencatat 240 kes positif HPV dan satu (1) kes pra-kanser".

Ujian HPV DNA dilakukan untuk mengesan satu (1) atau lebih jenis HPV berisiko tinggi dalam kalangan wanita. Wanita akan dibekalkan dengan kit ujian HPV DNA dan mereka boleh mengambil sampel menggunakan kaedah persampelan sendiri. Kaedah ini lebih mudah, berkualiti dan sangat berkesan. Pengesanan ini boleh dilakukan secara rutin setiap 5 tahun sekiranya keputusan adalah normal.

*Human Papilloma Virus* (HPV) adalah jangkitan kelamin yang boleh dijangkiti melalui hubungan seksual. Di Malaysia, kanser serviks adalah kanser ketiga paling kerap berlaku dalam kalangan wanita. Terdapat lebih 100 jenis virus HPV yang menyebabkan penyakit jangkitan seksual pada lelaki dan wanita. Daripada jumlah tersebut, 14 jenis HPV berisiko tinggi menjadi penyebab berlakunya kanser kalangan wanita. HPV Jenis 16 dan 18 adalah jenis berisiko tinggi dan kedua-duanya boleh menyebabkan kira-kira 70 peratus (%) daripada kanser serviks.

Turut hadir pada majlis ini adalah Dato Sri Rohani Abdul Karim, Pengerusi LPPKN, Tuan haji Abdul Shukur Abdullah, Ketua Pengarah LPPKN dan Dr. Ooi Choo Huck, Pengarah Jabatan Kesihatan Negeri Sarawak.

Tamat.

-----

Disediakan  
Unit Komunikasi Korporat  
LEMBAGA PENDUDUK DAN PEMBANGUNAN KELUARGA NEGARA  
30 September 2023  
(Pn. Rosmonaliza AG - 019 233 3415)